



普賢菩薩行願讚

大正藏經 第10 冊 No. 0297 普賢菩薩行願讚

以一剎那諸未來	我入未來一切劫	三世所有無量劫	剎那能入俱胝劫
所有三世人師子	以一剎那我咸見	於彼境界常得入	如幻解脫行威力
所有三世妙嚴剎	能現出生一塵端	如是無盡諸方所	能入諸佛嚴剎土
所有未來世間燈	彼皆覺悟轉法輪	示現涅槃究竟寂	我皆往詣於世尊
以神足力普迅疾	以乘威力普遍門	以行威力等功德	以慈威力普遍行
以福威力普端嚴	以智威力無著行	般若方便等持力	以菩提威力皆積集
皆於業力而清淨	我今摧滅煩惱力	悉能降伏魔羅力	圓滿普賢一切力
普令清淨剎土海	普能解脫眾生海	悉能觀察諸法海	及以得源於智海
普令行海咸清淨	又令願海咸圓滿	諸佛海會咸供養	普賢行劫無疲倦
所有三世諸如來	菩提行願眾差別	願我圓滿悉無餘	以普賢行悟善根
諸佛如來有長子	彼名號曰普賢尊	皆以彼智慧普賢名	願我於今盡同彼
身口意業願清淨	諸行清淨剎土淨	如彼智慧未來劫	一切圓滿作無餘
普賢行願普端嚴	我行曼殊室利行	於諸未及業煩惱	盡知一切彼神通
所須勝行無能量	所有功德不可量	無量修行而住已	乃至我願亦皆盡
乃至虛空得究竟	眾生無餘究竟然	天妙人民勝安樂	如剎微塵劫捨施
若人於此勝願王	一聞能生勝解心	於勝菩提求渴仰	獲得殊勝前福聚
彼得遠離諸惡趣	彼皆遠離諸惡友	速疾得見無量壽	唯憶普賢勝行願
得大利益勝壽命	善來為此人生命	如彼普賢大菩薩	彼人不久當獲得
所作罪業五無間	由無智慧而所作	彼誦普賢行願時	速疾銷滅得無餘
智慧容色及相好	族姓品類得成就	於魔外道得難摧	常於三界得供養
速疾往詣菩提樹	到彼坐已利有情	覺悟菩提轉法輪	摧伏魔羅并營從
若有持此普賢願	讀誦受持及演說	如來具知得果報	得勝菩提勿生疑
如妙吉祥勇猛智	亦如普賢如是智	我當習學於彼時	一切善根悉迴向
當於臨終捨壽時	以此迴向殊勝願	我皆一切諸善根	悉已迴向普賢行
得到於彼會甚端	悉皆現前得具足	親覩得見無量光	速往彼剎極樂界
於彼獲得受記已	變化俱胝無量種	我當圓滿皆無餘	眾生利益無量光
若人誦持普賢行	殊勝無量福德聚	於彼獲得有情諸	十方世界以慧力
我獲得此普賢行	殊勝無量福德聚	以一剎那得如願	以此群生獲勝願
		所有群生溺惡習	皆往無量光佛宮

